

Seken Timoti Nægkiariien sə rani mə nəfe i nəkukuə

Nəp̄in Pol ruvərai raka Fas Timoti mine Taetas kətoni mə kəkwtəmhiri mwi in kuvei puvnimwə ia kalapus. Nənə in r̄irai Seken Timoti ia kalapus fwe Rom. Pol rukurən mə nəp̄in səvənhi ruvəkwa kwa mə tremhə ro pen r̄irai nəkukuə i revən ti Timoti. Pol rəpwəh nōkeikeiien mə trətōni a Timoti, mətə rokeikei mə trətōni nənə muvehi utə nətəriq̄ien səvənhi ti nəri nə mə in rokeikei mə nəp̄in tremhə Timoti truvehi təmwhək̄in ia wok səvənhi. Pol ramahatən Timoti ia niriien nakalasia me maməvəhag min mə trərer isipw̄in ti nahatən eikuə me. Pol raməvəhag m Timoti mə Timoti traməkeikei məkwtəmhiri əknek̄in nəgkiariien sə ro n̄ipər̄hienien i kamahatən nakalasia me səvəi Kristo irə.

¹ Iou Pol. Iou aposol riti səvəi Iesu Kristo ti nəri nə mə Kumwesən r̄iməni nəkwan mə tako. In rər̄hi pen iou mə takəvisau irapw n̄im̄iruien sə in r̄iməni mə truvei pehe m kitaha ruku pen ti Iesu Kristo.

² Nəkukuə i rauvehe tukw ik, Timoti, nərik̄ keikei.

Pwəh Kumwesən Tata səkitaha mine Iesu Kristo Iərimənu səkitaha trouəriari pehe namasanien mine nap̄iien mine nəmər̄inuien mik.

Pol raməvəhag m Timoti

³ Ia nəpɪn mɪne ia ran, nəpɪn iakaməfwaki, rerik ramrhi rerɪn ik, nənə iakani vivi Kumwesən tukw ik. Iakamo tukwini nari min, mamə a noien me səməme iakukurən mə hatukwatukw ia nənimen rəmwhen ia kaha kupwən me səiou hənəmo.

⁴ Nəpɪn rerik ramrhi nise nənimem sə rɪnaiu, iakoikei pɪk mə takətoni ik, nənə rerik ragien.

⁵ Rerik ramrhi nahatətəien pərhiən səim, in nəha nahatətəien sə kaha pran səim Loes mɪne mama səim Iunis kroukupwən rouahatətə irə, nənə təkwtəkwuni iakukurən amasan mə ik mwi ikamahatətə irə.

⁶ Ro iamɪnhi irə iakuə tako pwəh rerim ramrhi nəri fwe ia rerim ramo ikamskai tɪ noien wok səvəi Kumwesən. Kumwesən rəriari nəri nəha mik fwe kupwən nəpɪn iakəmri utə rəgɪk mi ia niram. Tikaməkei meireiri nəri nəha pwəh ruək.

⁷ Iakani iamɪnhi irə tɪ nəri nə mə Kumwesən rɪpkuvei pehe mhə m kitaha nənimwɪn riti sə ramo kitaha samhekɪr, mətə in ruvei pehe m kitaha nənimwɪn riti sə ramo kitaha saməskai, mamhokei kitaha me, mamhəkoui atukw kitaha mə tsəpko mhə noien ərəha.

⁸ Ro iamɪnhi irə tikəpwəh naurisien tɪ nini irəpwien Iərimənu səkitaha, məpwəh naurisien mwi tukw iou, iərmama riti səvənhi sə iakamarə ia kalapus tukwe. Mətə pwəh krau pəri krouregi nəmɪsəien tɪ nəgkiariien amasan səvənhi. Kumwesən truvei pehe nɪskaiien mik mə tiko iamɪnhi.

⁹ In rɪməvehimɪru kitaha, nənə, məkwein kitaha ia nəkweinien sə ro ikinan i. In rɪpko

1:3: Fil 3:5, Wok Me 23:1 **1:5:** Wok Me 16:1 **1:6:** 1Tim 4:14

1:7: Rom 8:15 **1:8:** Rom 1:16 **1:9:** Efes 2:8-9, Taet 3:5

mhə iam̄nhi irə ia kitaha t̄i noien me sək̄itaha, mətə in ro iam̄nhi irə t̄i nəri nə mə resi pen a nətərigien atukw səvənhi sə in ruvəukurən raka fwe tui nəp̄in t̄iprənə ramiwən ihi. Ia nəp̄in nəha in ruvəni raka mə truvei pehe namasanien səvənhi m̄ kitaha truku pen t̄i Iesu Kristo.

¹⁰ Nənə təkwtək̄wuni sət̄oni namasanien nəha ro m̄ kitaha, t̄i nəri nə mə ləmə sə rauvehim̄iru kitaha r̄iməier pehe. ləmə nəha in nə Iesu Kristo sə r̄ino sampam ia noien iərmama remhə, nənə ia nəgkiariien amasan səvənhi ramo nərmama me hət̄oni mə tuhəfo mhəuvehi n̄im̄iruien rer̄in.

¹¹ Kumwesən r̄inərpwi rəḡin ia nirak, m̄ini mə iou aposol riti sə takaməkeikei m̄əvisau nəgkiariien amasan nəha, mahatən nərmama me irə.

¹² Nənə t̄i nəri nə mə iakamo iam̄nhi irə, iakamregi rərəha i ia kalapus. Mətə iapkauris mhə, t̄i nəri nə mə iakukurən iəmə sə iakani n̄ipər̄hienien irə. In rəmri pehe nəgkiariien amasan səvənhi ia rəḡik, nənə iakukurən amasan mə trət̄ui amasan tukwe mamevən meste nəp̄in səvənhi.

¹³ Timoti, tikaməkeikei mək̄wtəm̄hiri əknek̄in nəgkiariien me i səməme ikuvəregi raka iak̄ini pehe tukw ik i. Nəgkiariien me nəha hatukwatukw, mamhahatən suatuk sə tikesi pen. Tikaməmwur pen ia noien mi nəha nahatət̄əien m̄ine nokeikeien sə krauku pen t̄i Iesu Kristo.

¹⁴ Ia n̄iskaiien səvəi Nən̄imw̄in Ikinan sə ramarə ia rer̄itaha tikaməkeikei mət̄ui amasan t̄i nəri amasan sə kəmri pehe ia rəḡim.

¹⁵ Ikuvæukuræn raka mæ nærmama pam fwe profens Esia hænæpwæh iou mhæuvavæn. Iæmæ mi næha Fukelas mine Hemokenes iræha minraha.

¹⁶ Mætæ iakamæfwaki mæ Iærimænu sækitaha trapi nærmama me ia nækwai nimwæ sævæi Onesiforas, ti næri næ mæ næþin ripik in ramomasan iou, nænæ mipkauris mhæ iou mine jen me kinærihi iou iræ.

¹⁷ Mætæ næþin rapirapw ia Rom, ramætui æmisæ iou mamevæn meste mætæ iou.

¹⁸ Iakæfwaki mæ Kumwesæn træseni in rætoni Iærimænu sækitaha trapi in ia næþin sævænhi. Nænæ ikukuræn amasan mæ rasitu pik ia nirak fwe ia Efesas.

2

¹ Ro iamînhi iræ, nærik, ik tikamækeikei muvehi namasanien i raku pen ti Iesu Kristo pwæh ro ikiskai.

² Nænæ nægkiariien sæ ikuværegi raka iakinahatæn kîmiaha iræ ia næmri nærmama me hæþik, tikamækeikei mæmri pen ia rægi næmæ me nepwîn ikukuræn nætigiteien ia niræha mæ tuhahatæn nepwîn mwi.

³ Tikæmisæ krau mik ræmwhen ik iaruaagæn amasan riti sævæi Iesu Kristo.

⁴ Ikukuræn noien sævæi iaruaagæn. Næþin ramaruaagæn, ko ræpwæh nuvehien mwi wok me nepwîn, ti næri næ mæ ramæmwur mæ iæmæ asori sævænhi rerin tragien.

⁵ Iærmama sævæi naiuien tramækeikei mesi pen natuakæmien me sævæi naiuien. Mæ ræpwæh ko kîpkæfæfau pen mhæ kæfæfau sævæi nisaiien iræ.

⁶ Nənə iərmama sə ramənhu pik ratukwatukw mə in trukupwən mesi kwənkwai nari sə rutə ia nəmhien səvənhi.

⁷ Rerim tramrhi nəfe iakamini pehe tukw ik i. Iərimənu səkitaha truvei pehe nukurəniēn mik, nənə tikukurən narimnari me pam.

⁸ Rerim tramrhi Iesu Kristo. In iəmə sə rinətui mwi ia nemhəien səvənhi. In kwənəkʷus səvəi Kig Tevit. In i nəgkiariien amasan sə iakaməvisau irapw.

⁹ Iou iakamregi nəmisəien ti nəgkiariien amasan i. Kinərihi iou ia jen rəmwhen ia iou iəmə iakamərui loa, mətə nəgkiariien səvəi Kumwesən ko kipkərihi mhə ia jen.

¹⁰ Ro iamīnhi irə, nəri auər a mə kamo nəmisəien me ia nirak, mətə takaməkeikei mamərer əknekīn ia nəpīn me ti nəri nə mə rerik ramrhi nərmama me nəha səməme Kumwesən ruvərʷi raka irəha. Ikokeikei mə irəha mwi tuhəuvehi nīmīruien vi sə raku pen ti Iesu Kristo, nənə mharə rerin irəha min ia nukuraanien asori səvənhi.

¹¹ In i nəgkiariien pərhiēn:

Trini minuə səmamhə kitaha Iesu,

nənə tsaməkeikei mwi mhəmīru pəri kitaha min.

¹² Trini minuə samərer əknekīn ia nahatətəien səkitaha,

nənə tsaməkeikei mwi mhərimənu pəri kitaha min.

Trini minuə səni mə səreirei in,

nənə in mwi traməkeikei mīni mə in rīreirei kitaha.

13 Trini minuə kitaha səmwei ia nahatətəien
 səkitaha,
 in traməkwtəmhiri ihi kitaha,
 ti nəri nə mə in ko rīpkətəfi mhə nəgkiariien
 me səvənhi.

*Iərmama sə ramo tukwini amasan nari m
 Kumwesən*

14 Tiko nərmama me səim pwəh rerinraha ram-
 rhi narimnari me i ikani. Tikini pen ti nirəha i
 ia nəmri Kumwesən mə tuhəpwəh nousariien ti
 nəgkiariien me. Noien nəha ko rīpko mhə nari
 amasan riti, mətə ramouraha a nərmama səməme
 kamhətərig.

15 Tikəmwur mə ik iərmama riti səvəi wok sə
 nəpīn Kumwesən ramətə wok səim ko rini mə
 “Wok səim ramasan.” Nənə tikəpwəh niregiiien
 ikauris ti wok səim, ti nəri nə mə ikamahatən atuk-
 watukw nəgkiariien sə ro nīpərhienien.

16 Mətə nəgkiariien auər a me səvəi tīprənə i, ik
 tikəpwəh niniien. Nəgkiariien me nəha tuhəiri pen
 nərmama həuvən isipwīn ti Kumwesən.

17 Nəgkiariien səvəi nərmama səməme
 kamhəgkiari iamīnhi truviris rəmwhen ia
 nīmwapw ruvehe masori. Nəgkiariien səvəi iəmə
 mi nəha Hameneus mīne Faelitas ro iamīnhi.

18 Irau krīnouəpwəh raka nəgkiariien pərhien
 rauni mə nəpīn sə Kumwesən tro nərmama me
 pam hətui mwi ia nemhəien ruvəuvehe raka.
 Ia nəgkiariien nəha səvənrau kraouraha na-
 hatətəien səvəi nərmama me nepwīn.

2:13: Rom 3:3-4, Nam 23:19, Taet 1:2 **2:14:** 1Tim 6:4, Taet 3:9

2:15: 1Tim 4:6, Taet 2:7-8 **2:16:** 1Tim 4:7 **2:17:** 1Tim 1:20

¹⁹ Mətə nəri əknekɪn Kumwesən rɪnəmri kau-
vrhəkɪn nimwə ia təkuren rəpwəh nɪkiuien. Nənə
kɪmərɪai pen nəgkiariien me i ia nɪkaren: Riti
mə, “Iərɪmənʉ ruvəukurən raka mə nərmama əfo
me nəha səvənhi.” Nənə riti mwi mə, “Pwəh
nərmama pam səməme kəmhəni nɪpərhiien ia
nəghi Iərɪmənʉ həpwəh noien ərəha.”

²⁰ Ia nəkwai nimwə asori riti nəri kəməni pen
nari me irə səpəmsəpə. Rɪpko mhə səməme
nəha əpa kɪno ia aean mi nəha kol mɪne silva,
mətə nepwɪn mwi nəha ikɪn kɪnərɪai ia nɪpəri nei,
nepwɪn mwi kɪno ia nɪse tɪprənə rərpwu muvehe
mɪskai. Nepwɪn kəməni nari irə ia nəpɪn ikinan
me. Nepwɪn kəməni nari irə ia nəpɪn auər a me.

²¹ Ro iamɪnhi irə trɪni mɪnʉə iərmama riti
rəpwəh noien ərəha me, məpərhi in, in truvehe
məmwhen ia nəri kəməni pen nari irə sə kɪnəmri
əpə mə səvəi nəpɪn ikinan me. Kɪnəpnəpenə raka
irə mə iəmə asori səvəi nimwə nə rukurən nuvehi-
ien mo noien amasan me pam irə.

²² Mətə noien ərəha me ntəmarʉə me hokeikei
pɪk, ik tikaraka məpwəh nəvənien ipaka tɪ nɪrəha.
Ia nəpɪn me pam tikaməkeikei mamə noien atuk-
watukw, mamahatətə ia Kumwesən, mamokeikei
nərmama, mamarə ia nəmərɪnuien. Tikamarə
mamə noien me nəha kɪmɪaha nərmama me nəha
səməme kəmhəkweɪn Iərɪmənʉ ia rərɪnraha sə
ratukwatukw məmher.

²³ Tikərer isɪpwɪn tɪ nəresien me nəha nərmama
həreirei nari kəmhəni. Ikukurən mə nəresien me
nəha kəmhəvi pehe nəvisəien me.

²⁴ Mətə noien səvəi iərmama sə ramo tukwini nari m Iərimənu traməkeikei mōpə. Ripko mhə in iərmama səvəi nəvisəien, mətə in iərmama sə ramasan ti nərmama pam. In iərmama sə rukurən nahatənien nərmama, nənə niemaha ripkəpi akwauakw mhə in.

²⁵ In iərmama sə raməgkiari məru ti nəmri atukwatukwien nərmama səməme haməmwəki in, pwəh Kumwesən rəsəni irəha hərərig ia noien ərəha, mhəuvehe mhəukurən nəgkiariien pərhiən.

²⁶ Ia noien nəha irəha ko həier irapw ia kwənkru səvəi Setan in rīməuvehi irəha irə mamō irəha hamō nəkwān.

3

Tramevən ipaka ti nəpīn sampam

¹ Mətə tikaməkeikei mukurən nəri. Tramevən ipaka ti nəpīn sampam narəien ia tiprənə i truvehe məknekīn.

² Nərmama tuhokeikei atukw a irəha me, nənə mhokeikei pik mane. Irəha tuhəfiəutə atukw irəha me, nənə mhərpwi pik irəha me. Irəha tuhəni nəgkiariien ərəha mhəuəsi nərmama me i. Irəha tuhərui nəkwai tata mine mama səvənraha. Nəpīn tukuvei pen nari amasan riti minraha, irəha tuhəpkini mhə tanak tukwe. Irəha tuhəpkō mhə nəkur ikinan me ia nirəha.

³ Irəha tuhəpkapi mhə ti nərmama, mətə tuhərpwīn a tai nərəhaien səvənraha. Irəha tuhəni nīkare nərmama. Irəha tuhəreirei nari, mamho pen a nari ia nəpīn me, mhəpkokeikei mhə noien amasan.

⁴ Irəha tuhəuvsini təkutanraha m piəvnraha me, mho akwauakw noien ərəha, mhəpkətərig mhə ti noien səvənraha mine nəfe kamho. Irəha rerinraha trukuar ia nəgnəginiien atukw irəha me, mhokeikei pik narimnari me nipwranraha ramregi ramasan irə, nənə, mhəpkokeikei mhə Kumwesən.

⁵ Ia nəmri nərmama tukətoni irəha həmwəhen ia nəkur əfwaki me, mətə nəgse Nənimwin səvəi nəfwakiien riwən ia nirəha. Nənə ik tikaməkeikei mərer isipwin ti nərmama səməme hamo iamihhi irə.

⁶ Irəha me nepwin kamhəuvnimwə ia nəkwai nimwə me mamheikuə ia nipran me. Nipran me nəha nəgsenraha riwən, həuvəpəmpəm ia noien ərəha me, nənə narimnari ərəha me səpəmsəpə hokeikei pik ramiri irəha.

⁷ Kamahatən irəha ia nukurənien ia nəpən me, mətə ko irəha həpkukurən amasan mhə nəgkiariien pərhien ia nəpən riti.

⁸ Ikukurən klepa mi nəha Janes mine Jampres sə krauni ərəha Moses fwe kupwən. Nərmama me i iakani, irəha həmwəhen ia nirau, mamhəni ərəha nəgkiariien pərhien. Irəha nərmama me nətərigien səvənraha rikou, həpkahatətə pərhien mhə ia Kumwesən.

⁹ Mətə irəha tuhəpkarə əpwəmwis mhə. Nərmama me pam tuhətə sas noien ikou me səvənraha rəmwəhen ia nərmama me hənətə sas noien ikou səvəi Janes mine Jampres fwe kupwən.

Nəvəhagien sampam

3:5: Mat 7:15,21, Rom 2:19-20, Taet 1:16 **3:6:** Taet 1:11 **3:8:** 2Tim 2:25, Eks 7:11,22, 1Tim 6:5

¹⁰ Mətə ik, Timoti, nəpɪn ikinakurirə ia nirak fwe kupwən, ikuvəregi raka nahatənien səiou, minətə raka noien səiou sə iakamarə mamō. Ikinətə raka nəfe iakaməmwur tukwe ia nimiruien səiou. Ikinətə raka nahatətəien səiou, mine nətərigien səiou sə iakaməfo mo raməpwəmwis. Ikinətə raka nokeikeiien səiou, mukurən mwi nərərien səiou sə iakamərer əknekin irə ia nəpɪn me.

¹¹ Ikinətə raka nometəien me mine nəmisəien me kino ia nirak fwe ia taon me nəha Antiok mine Ikoniam mine Listra. Kinamometə iou iamɪnhi irə, mətə Iərimənu səkitaha ruvehi raka iou ti nəmisəien me pam nəha.

¹² Nipərhiēnien, nərmama me pam səməme hokeikei mə tuhəuvehe mho kuation irəha Iesu Kristo, nənə mamharə ia narəien sə Kumwesən rokeikei, tukaməkeikei kometə irəha.

¹³ Mətə nərmama ərəha me mine nərmama eikuə me narəien səvənraha sə rinərəha raka tripkuvehe mərəha mwi. Irəha tuhameikuə ia nərmama me, nənə mamheikuə atukw a mwi ia nirəha.

¹⁴ Mətə ik tikaməkeikei məkwtəmhiri əknekin nəgkiariien sə kinahatən raka ik irə. Ikuvəni raka nipərhiēnien ia nəgkiariien nəha, mamahatətə əknekin irə, mukurən amasan nərmama səməme hənahatən ik irə.

¹⁵ Fwe ia nouihien səim ikuvəukurən raka nəgkiariien me səvəi Nəkukuə Ikinan. Nəgkiariien me nəha kamhəuvei pehe nukurənien mik. Nukurənien nəha ramiri pen ik ikevən mahatətə ia Iesu Kristo mə Kumwesən truvehimiru ik.

¹⁶ Nəgkiariien me pam ia Nəkukuə Ikinan

haməuku pen ti Nənimwɪn səvəi Kumwesən.^a Nəgkiariien me nəha hamasitu ia kitaha. Kitaha səukurən niniiən nəgkiariien me nəha mhahatən nərmama, mhəni pui noien ərəha me səvənraha, mhəkoui atukwatukw irəha, mhəvəhag mɪnraha ia noien atukwatukw.

¹⁷ Nəpɪn samo iamɪnha irə tro iərmama səvəi Kumwesən ruvehe məmwhen ti noien wok amasan me pam.

4

Timoti traməkeikei məvisau irapw nəgkiariien amasan

¹ Timoti, təkwtəkwuni iakaməgkiari pehe mik rəmwhen krau krouərer ia nəmri Kumwesən mine Iesu Kristo. Ikukurən Iesu Kristo in iərmama sə trəkiri nərmama me pam ti noien me səvənraha, nərmama səməme kamhəmɪru mine səməme həuvəmhə raka. In trier pehe mwi mərimənu ia nɪtətə səvənhi. Ti nəri nə mə tro iamɪnhi irə, ro pen iakani pehe tukw ik i mə

² tikaməkeikei məvisau irapw nəgkiariien səvənhi, məmərer mwatuk tukwe ia nəpɪn me pam, nəpɪn nərmama hokeikei mə tuhəregi mine nəpɪn nərmama həpwəh nokeikeiien mə tuhəregi. Tikini pui noien ərəha me səvənraha, mɪnise pen əknekɪn ti nɪrəha mə tuhəpwəh, muvei pen nəgkiariien sə trasitu ia nɪrəha, mo iamɪnhi irə səim nətərigien rəpwəmwis, nənə, mahatən amasan irəha.

^a **3:16:** Suatuk riti mwi ti niniiən nəgkiariien i ia vas 16 ro iamɪnhi irə: Nəgkiariien me pam ia Nəkukuə Ikinan Kumwesən rɪneiahag pehe irə. **4:1:** Wok Me 10:42, Rom 14:9-10 **4:2:** Wok Me 20:20,31

³ Tikaməkeikei mamō iam̄nhi irə ti nəri nə mə nəp̄in riti tripkuvehe nərmama me tuhəpkətərig mhə nəgkiariien sə ro n̄ipərhiēnien, mətə irəha tuhesi pen nətərigien atukw səvənraha, nənə mhətui nahatən me səməme tuhəni nəgkiariien sə nəkwəreginraha rəfiəfiə ti n̄iregiēn.

⁴ Irəha tuhəpwəh nəgkiariien sə ro n̄ipərhiēnien, nənə mhəuvən mhəkurirə kwənagei eikuə me.

⁵ Mətə ik, tikaməkeikei mo nətərigien səim pwəh raməmak amasan ia nəp̄in me. Tikərer əknek̄in ia nəm̄isəien me sə kamo ia niram, nənə mo wok i səvəi nəvisaiuen nəgkiariien amasan, nənə mo pam wok səim sə Kumwesən ruvei pehe mik mə tiko.

⁶ Iakani iam̄nhi irə ti nəri nə mə tripkō mhə tui n̄itek raiu rəmwhen ia waen i kətəgi pen ia təkure n̄ifatə kuvei pen m Kumwesən. Səiou nəp̄in takier irə ruvəuvehe ipaka.

⁷ Ia n̄im̄iruiēn səiou rəmwhen mə iakamaruagən ia naruagənien amasan riti. Rəmwhen mə iakamaiu ia naiuiēn əknek̄in riti. Nənə təkwtəkwuni iakino sampam irə, nənə iakamahatətə ihi.

⁸ Təkwtəkwuni kinəpnəpenə kəfəfau riti fwe səiou kaməfəfau pen ia nəmə atukwatukw me. Iərimənu səkitaha raməkiri atukwatukw nari in truvei pehe kəfəfau nəha miou ia nəp̄in səvənhi. Tripkuvei pehe əpa mhə miou, mətə truvei pen mwi m nərmama me pam səməme hokeikei in nənə mamheitenhi in mə truvehe mwi.

Pol rokeikei mə Timoti trevən mətoni in

⁹ Tikaməmwur muvehe mətə akwauakw iou,

¹⁰ ti nəri nə mə Temas rokeikei pik anan narəien ipwet mine səvəi tɪprənə i, nənə minəpwəh iou, muvavən fwe Tesalonaeka. Kresens ruvavən fwe Kalesia, nənə Taetas ruvavən fwe Talmesia.

¹¹ Təkwtəkwuni Luk əpa ramarə kimrau min. Nəpɪn tikauvehe irə tikiri Mak kimirau min, ti nəri nə mə in rukurən nasituien mo tukwini nari miou.

¹² Iakinərhi pen Tikikas ruvavən fwe Efesas.

¹³ Nənə nəpɪn tikauvehe irə, tikuvehi karkahu səiou səvəi nəkwieien iakinəpwəh raməmak ia nimwə səvəi Karpas fwe Troas. Tikuvehi mwi nəkukuə me. Iakokeikei pik mə tikuvehi səməme nəha kimərai pen ia teki nəni.

¹⁴ Fwe kupwən, Aleksanta, iəmə sə ramo nari ia aean, ro pik nəmisəien miou. Iərimənu trərpwɪn noien ərəha me nəha rino miou.

¹⁵ Nənə ik mwi tikaməkeikei məsiari in, ti nəri nə mə fwe kupwən in raməmwur mə trinise nəgkiariien səkitaha.

¹⁶ Nəpɪn iakinərer vi ia nəmri iəmə asori ia kwopun i mə takini irapw nəgkiariien səiou ia nɪkaren səvəi nəgkiariien me nəha kamini ərəha iou irə, iərmama riti riwən ruvehe mərer ia nɪkarek mə trasitu. Mətə irəha pam hap raka ia nirak. (Iakəfwaki mə Kumwesən trərpwəh nərpwɪnien noien nəha minraha.)

¹⁷ Mətə ia nəpɪn nəha Iərimənu səkitaha ramərer ipaka tukw iou, mauvei pehe nɪskaiien miou, mə iou iakukurən nəvisau irapwien nəgkiariien me pam səvənhi, nənə nərmama me pam səməme

4:10: Kol 4:14, Taet 1:4 **4:11:** Kol 4:14, Wok Me 15:37-39 **4:12:** Efes 6:21-22 **4:13:** Wok Me 20:6 **4:14:** 1Tim 1:20, Sam 62:12, Prov 24:12, Rom 2:6 **4:16:** 2Tim 1:15 **4:17:** Wok Me 23:11, 27:23, Dan 6:22

häreirei Kumwesən həukurən niregiiən. Nənə in ruvehi raka iou ia nərəhaien nəha rəmwhen mə ruvehi raka iou ia nəkwai laeon.

¹⁸ İərimənu səkitaha truvehi raka iou ia noien ərəha me pam nərmama hənuə tuho ia nirak. In trətə amasan iou meste in ruvehi iou mevən fwe ia nitətə sə in ramərimənu irə fwe ia neiai. Pwəh nəgnəginiiən revən tukwe in ia nuk nuk me. Ouəh, pwəh ro iamihhi.

Nəgkariien sampam

¹⁹ Tikini pen ti Prisila mine Akwila mine nərmama me pam ia nəkwai nimwə səvəi Onesiforas mə iakini ramasan ti nirəha i.

²⁰ Erastas rəpkukurirə mhə iou. In ramarə a fwe Korin. Nənə iakinəpwəh Trofimas fwe Maelitas, ti nəri nə mə in ramemhə.

²¹ Tikaməmwur muvehe akwauakw tukw iou kurirə nəpən səvəi nəkwieiiən ruvehe.

Iupulas, Putens, Linus, Klautia mine piəvtaha me pam ia kwopun i həni ramasan tukw ik.

²² Pwəh İərimənu səkitaha tramarə ia rerim, məriari pehe namasanien m kımiaha pam.

Nəkukuə Ikinan
The New Testament in the Nafe (Kwamera) language
of Southeast Tanna, TAFEA Province, Vanuatu
Niutestamen long lanwis Nafe blong Vanuatu.
Le Nouveau Testament dans la langue Nafe de
Vanuatu.

copyright © 2013 Wycliffe Bible Translators, Inc.

Language: Nafe (Nafe)

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2019-06-18

PDF generated using Haiola and XeLaTeX on 18 Apr 2025 from source files dated 31 Aug 2023

26b0f540-c192-5878-be67-18ede9ab1416